



*Jumat, 17 Mei 2024*

**Ogen: Lukas 2:18-20**



**Muniken I bas ukur**



**R**encana ras dalan Tuhan e megati la siangka. Kita labo meteh kai si terjadi i bas geluhta enda. Si e kerina jadi erkiteken la seri sura-suranta, perukurenta ras sura-sura Tuhan. Rencananta ras rencana Tuhan ndauh petembil. Janah rencana Tuhan e lit ibabo pemikirenta manusia maka labo nukah guna ngertikensa.

Maria, nande Jesus nenganami si bage rupa. Lit si la iangkaina kerna rencana Tuhan. Tapi alu la nungkuni, Maria ngaloken si e kerina ras munikensa i bas ukurna. Asum reh permakan-permakan ndahi Jesus, permakan nuriken kejadi si mbelin i bas ia kerina kerna berita si isehken Malekat, i je Maria pe munikensa i bas ukurna kerna kai si ikataken permakan-permakan e. Bage pe asum Jusup ras Maria kebenen kerna Jesus, e maka idapetina Jesus sangana ngerana ras guru-guru agama Jahudi. Isungkun Maria me Jesus, janah ijabap Jesus alu ngatakensa, "engkai maka idaramindu aku? La kin ietehndu Aku arus i rumah BapangKu?" I je pe Maria munikensa i bas ukurna kerna kai si ikataken Jesus e.

Sikap Maria i bas la iangkaina e patut si usih. Lit paksana maka kita labo ngantusi kai si terjadi i bas geluhta enda tapi teklah maka si e kerina pagi ipetangkas Dibata man banta adi kita tetap ernalem ras ngendesken dirinta i bas rencana Tuhan. Ingetlah maka Tuhan e mehuli dinggen labo ngerencanaken si jahat man banta. Asangken kita nuri-nuri kai si la iangka i bas geluh enda man kalak si deban, ku media sosial, madin turiken man Tuhan arah pertotonta. Penungkunen man banta kerna muniken i bas ukurta :i bas wari enda lit nge aku jungut-jungut man kalak si deban? Ngataken bujur nge aku wari enda i bas pasu-pasu si enggo ku aloken? Lit nge sendah ku cakapken kalak sideban? Ku sikapken nge ndia waktuku ercakup-cakap ras Tuhan? Si bahn jabapenna bas pusuh, janah si evaluasi sikap geluhta teptep wari.